

## *Immens frou, fir de Kamerun mat senge Leit a senger Kultur kennegeléiert ze hunn*

**Andréck vum Caroline Scholtus vum der rezenter Visite de coopération  
am Kamerun, vum 8. bis 16. September 2014**

Bebekiri Dir léif Leit,

E gudde Mount no eiser Kooperatiounsrees an de Kamerun, denken ech nach gär un déi Zäit zréck. An deenen 8 Deeg dohannen hu mir vill erlieft, geschmaacht a gesinn. An dësem Bericht wëll ech lech e bësse vun där Rees erzielen.



En Deel vum Grupp vun der LLJ – JB & JW mat de Schülerinnen aus dem Collège Sainte Marguerite vu Zoétélé  
a mat der Schwëster Lotte Scholtus (r.a.B.)

Am meeschte sinn ech frou, endlech gesinn ze hunn, wéi a wou meng Tatta, d'Schwëster Lotty Scholtus, dohanne leeft! Am Süden vum Kamerun, zu Zoétélé, wunnt si direkt nieft engem Centre de Santé (deen ënnert anerem vun der ONG ënnerstëtzt gouf), dem Collège Sainte Marguerite an enger schéiner Kierch. Anescht wéi d'Haaptstad Yaoundé, ass et eng immens gréng Géigend, besonnesch während der Reenzäit. Nodeems mir eng Visite iwwert de ganze Site gemaach hunn, huet eng Fra aus dem Duerf eis mat an hiert Maniok- a Kakuettefeld - matzen am Tropebësch - geholl an äis gewisen, wéi si de Maniok upflanzen. Owe hu mir Meedercher dierfen an engem Zëmmer vum Schülerinternat schlofen, a mir

haten esouguer e Wiechter virun der Dier sätzen. Deen huet just esou haart Musek gelauschtert a matgesongen, sou datt mir eng Zäitche gebraucht hunn, fir anzeschlofen. Geduscht hu mir zwar an engem Buedzëmmer, mee do gouf et kee fléissend Waasser, dofir si mir äis en Eemer Waasser un de Pëtz siche gaangen.

Vu Zoétélé aus si mir den aneren Dag op Ndeng gefuer, wou d´Natur selwecht schéi bliwwen ass. Do si mir mam Pater - deen nach am September een dekoréierte Chrëschtbeemchen an der Stuff stoen hat - duerch eng 70 ha grouss Kakao- an Uebstplantatioun - dat och matzen am Tropebësch - getrëppelt. Et war flott ze gesinn, wéi a wou de gudde Schokla hierkënt. Ënnerwee hu mir nach vill aner exotesch Planzen entdeckt an de Romain krut souguer d´Geleeënheet, Bananne vum Bam ze schneiden. Dass Seechomessen extrem picke kënnen, huet d´Tessy op eemol ënnerwee am Gestrëpp materliewe missen. Gott sei Dank, hält de Wéi net all ze laang un!

### **Zefridden an dankbar Beneficiairen an der neier Maternité vu Soa**



D´Caroline Scholtus mat enger Infirmière virun dem Centre de Santé zu Soa. Am Hannergronn de Pol Majerus.

An d´Stad Soa, déi net wäit ewech vu Yaoundé läit, si mir méi oft gefuer, fir de Centre de Santé Sainte Marie ze besichen. Dëse Centre gouf a méi Etappe vun der ONG ënnerstëtzt. Et war super interessant dëse Projet op der Plaz ze gesinn. Zënter Februar 2014 gëtt et do eng Maternité, déi och mat der Hëllef vun der ONG an der Ënnerstëtzung vum Lëtzebuerger Ministär vun der Kooperatioun an der humanitärer Hëllef gebaut a mat dem néidege Material versuergt gouf. Mir hunn äis deen neien Deel vum Centre de Santé, deemno d´Maternité, ugekuckt éier se offiziell ageweit gouf. Et war schéin, aus eisem Gespréich mat de Mammen, Futur-Mamans an de Responsablen (Infirmiëren, Aides soignants, Gardiens)

erauszehéieren, dass si immens zefridden an dankbar iwwert dëse Projet sinn. D'Infirmièren hunn äis esouguer e klenge flotte Sketch virgespillt, iwwert den Alldag an hirem Centre. Wou se dunn e klenge Neigebuerenen bruecht hunn, ware mir all erstaunt, datt d'Afrikaner eng ganz hell Faarf hunn, wa se op d'Welt kommen.

### **D'Gaaschtfrëndschaft grouss geschriwwen**

Iwwerall wou mir invitéiert waren, goufe mir häerzlech empfaangen a kruten ee ganze Buffet zerwéiert; mat frëschem Uebst (Ananas, Papaya, Mango, Banannen, Waassermeloun, Clementinnen), Gromperen, Flesch, Poulet a Fësch an alle Variatiounen, Râis, Banane plantain (gebrode Banannen, déi mir perséinlech super geschmaacht hunn), Brout a ganz vill Geméis.



Iwwerall ass d'Gaaschtfrëndschaft mat engem wonnerbare Buffet ausgedréckt ginn

Eis Rees ass och an d'Duerf Ndziebetono gaangen, dat 170 km wäit ewech vu Yaoundé läit. Et ass d'Duerf, wou d'Schwëster Marie Pierrette, Verantwortlech vum Centre de Santé Sainte Marie, grouss ginn ass a wou nach e groussen Deel vun hirer Famill wunnt. Wat mir ëmmer méi no bei dat Duerf komm sinn, wat d'Stroossen ëmmer méi schlecht gi sinn. Knubbeleg Weeër an dunn och nach dee ville Reen, dee wéi mat Eemeren erofgefall ass, waren eng richtig Erausforderung fir d'Chauffeuren. Wéi mir schlussendlech am Duerf ukomm sinn, si mir awer wéi ëmmer häerzlech empfaange ginn. Nodeems mir dat klengt blechent Haischen erbléckst haten, mat engem Agank, wou e Lach war fir d'Toiletten an engem aneren Agank mat engem Lach fir sech ze duschen, hu mir äis einfach all fir eng kleng Kazewäsch entscheed. Owes waren du vun de Leit aus dem Duerf traditionell Dänz organiséiert ginn. Mat Trommelen a Gesank ass eng typesch afrikanesch Stëmmung opkomm an d'Danzféiwer hat mech dunn och e bëssi gepak. D'Feier ass bis spéit an d'Nuecht gaang, an dofir ass et deene meeschte vun äis schwéier gefall, angeschlossen. Obschonn ech direkt ageschlof sinn, well ech dat Trommelen éischer berouegend fonnt hunn, gouf ech du fréi moies vun engem Hunn erwächt. Ech menge ganz, dee stoung genee virun eiser Fënster!

Och eis Nuechten zu Yaoundé waren net ëmmer roueg. Am Centre d'accueil CASBA, an deem mir déi meescht Nuechte verbruecht hunn, hate se zwee Wuechthënn. Am Dag souzen se an hirem Zwinger, mee owes sinn se ronderëm gelaf. D'Tanja wollt eemol op d'Toilette

(déi baussent eisen Zëmmere war) goen, wéi een Hond op hatt duergelaf komm ass. D'Tanja ass dunn nees erëm séier am Zëmmer verschwonn. Ongeféierlech hunn déi jiddefalls net ausgesinn.

Awer elo nach kuerz zrëck an d'Duerf Ndziebetono... Hei krute mir moies um 08:30 Auer Ragout mat Spaghettien zerwéiert! Si hu gemengt, dat géiff äis fir d'Mass stäerken, déi méi wéi zwou Stonne gedauert huet. No der Mass hu mir äis erëm op de Wee zrëck op Yaoundé gemaach. Ënnerwee hu mir alt erëm gemierkt, datt vill Leit et am Kamerun net esou genee mam Code de la route halen. Si géifen am léifsten den Auto mat honnert Leit fëllen; Deen, deen am haartsten tut, huet Virfahrt; An d'Gurtpflicht kennen si souwisou net.



Et gi wierklech vill Ënnerscheeder tëscht do an hei, an ech hunn et immens interessant fonnt, mat de Leit aus dem Kamerun ze schwätzen, egal ob mat engem klengen Meedchen am Duerf (dat op eemol meng hell Hoer wollt upaken) oder engem jonken Uni-Student. Ech hunn et sympathesch fonnt, wéi d'Schwëster Marie Pierrette hinnen erkläert huet, datt ee bei äis an een Haus muss eragoen, fir den Handykredit opzelueden an datt d'Haus de Weekend zou wier. Am Kamerun steet all puer Meter e Verkeefer mat engem klengen Stand laanscht d'Strooss, fir Prepaid-Kaarten ze verkafen.

Alles an allem wunne mir awer all an därselwechter Welt an ech sinn immens frou, d'Chance gehat ze hunn, dëst Land, seng Mënschen a seng Kultur kennegeléiert ze hunn. Ech hoffen, mäi klengen Réckbléck mat e puer Erënnerungen huet lech gefall. Ech kucke jiddefalls gär op eis Rees zrëck.

**Caroline Scholtus**